

1257-1257- OFP - Acta Capitulum Generalium Florentie Celebrati

In nomine patris et filii et spiritus sancti. Amen.

Acta capituli generalis Florentie celebrati

anno Domini · M° · CC° · LVII° ·

Confirmamus has constitutiones. In capitulo de recipiendis. ubi dicitur. tempus probacionis assignetur. etc. addatur. ut ipsi austeritates ordinis et fratres mores experiantur ipsorum. et deleatur totum quod sequitur. probacionis vero tempus. usque ad illum locum. nullus vero recipiatur. etc. Et hec habet · iii · capitula.

Item hanc. In capitulo de silencio. ubi dicitur. seu eciam regum. addatur. seu eciam magistri ordinis. Et hec habet · iii · capitula.

Item hanc. In capitulo de domibus concedendis. post illud ubi dicitur. ut cura vel custodia monialium seu quarumlibet aliarum mulierum. nostris fratribus committatur. addatur. hac eadem districione precipimus. ne magister vel capitulum aliquod. curam predictarum recipiat; nisi per tria capitula fuerit approbatum. Et hec habet · iii · capitula¹.

Item hanc. In capitulo de electione prioris conventualis. ubi dicitur. fratres post annum professionis sue. dicatur. a professione sua. Et hec habet · iii · capitula.

Item hanc. In capitulo de electione diffinitorum. ubi dicitur. socius competens a priore provinciali et diffinitoribus assignetur. addatur. quod si supersedeatur illo anno a capitulo generali. qui in sequenti capitulo provinciali electus fuerit; habeatur generalis capituli diffinitor. Et hec habet · iii · capitula.

Item hanc. In capitulo de studentibus. post illud. quilibet prior provincialis potestatem habeat mittendi duos fratres ad studium. addatur. quod si in aliqua dictarum provinciarum. lector sufficiens. pro tali studio non fuerit. magister ordinis provideat de lectore competenti. Et hec habet · iii · capitula.

Item hanc. In capitulo de conversis. ubi dicitur. sicut et tunice. addatur. sed similis coloris capis clerici corum. Et hec habet · iii · capitula².

Approbamus has. In capitulo de suffragiis mortuorum. ubi dicitur. in unaquaque provincia. etc. deleatur totum. usque ad anniversarium fratrum. et dicatur sic. quilibet fratrum celebret · xxx · missas in anno. pro fratribus ordinis defunctis. et quilibet clericus · xxx · vicibus · vii · psalmos. et quilibet conversus · xxx · vicibus · c · pater noster. Et hec habet · ii · capitula.

Item hanc. In eodem. ubi dicitur. et quilibet conventus unam in communi. dicatur sic. quilibet conventus · xx · missas in communi. Et hec habet · ii · capitula.

Item hanc. In capitulo de electione prioris provincialis. ubi dicitur. poterit autem nichilominus ipsum magister ordinis confirmare. vel amovere. addatur. quod si ordo magistrum non habuerit; tres de ipsis electoribus. alii ab electo. qui primitus habitum nostri ordinis susceperunt ipsum confirmandi. et compellendi ad officium. habeant potestatem. quod si non concordaverint; duorum sententia prevalebit. si vero electum non confirmaverint; ab eisdem electoribus ad electionem iterum procedatur. et ad tres predictos antiquiores secundum predictam formam; confirmacio pertinebit. Et hec habet · ii · capitula.

Item hanc. In capitulo de ieiuniis. in fine dicatur sic. In parasceve per totum diem. in pane et aqua; abstinemus. et de ordinario removeatur. quod ibi de hoc ponitur. Et hec habet · ii · capitula.

Inchoamus has. In capitulo de officio ecclesie. in fine addatur. qui incepit horas. tam in choro. quam extra chorum. dicat fidelium anime etc. excepto magistro ordinis. et prioribus provincialibus. et quod in ordinario de hoc dicitur; removeatur.

Item hanc. In capitulo de silencio. ubi dicitur. cum contigerit cum eis comedere. addatur. quilibet autem prior provincialis in provincia sua dum est in mensa; uni tantum fratri. licenciam loquendi dare poterit. cum viderit expedire.

Item hanc. In capitulo de professione. post illud. tuisque successoribus usque ad mortem. dicatur sic. nullus autem. excepto magistro. aliquem ad professionem recipiat. nisi de voluntate maioris partis capituli; ubi debet novicius profiteri.

Item hanc. In capitulo de electione prioris conventualis. ubi dicitur. fratres autem post annum. a professione sua. deleatur. post annum. et dicatur. post duos annos.

Item hanc. In eodem capitulo. ubi dicitur. si vero infra mensem non elegerint. addatur. vel postulaverint.

Item hanc. In capitulo de electione diffinitorum capituli provincialis et generalis. ubi dicitur · iiiior · fratres de discrecoribus. et magis ydoneis. addatur. qui sint de capitulo provinciali ab ipso capitulo eligantur. etc.

¹ De cura monialium cf. DENIFLE Archiv etc. II, 641 sqq.; et FINKE Dominikanerbriefe, Paderborn 1891 p. 45.

² Nondum unius eiusdemque coloris erat cappa clericorum, sed, teste Humberto, alius cappa nigra indui consueverat, alius rufa, alius grisea; cf. Humbertus Opera etc. tom. 2, p. 5.

Item. In eodem capitulo. ubi dicitur. aliquis de magis ydoneis eligatur a capitulo. deleatur. a capitulo eligatur; et totum quod sequitur usque. si vero. et dicatur sic. aliquis de magis ydoneis. a maiori parte provincialis capituli eligatur. qui sit generalis capituli diffinitor. cui socius. qui secundum eamdem formam electus sit; assignetur.

Item hanc. In capitulo de capitulo provinciali. ubi dicitur. cum singulis sociis. a pluribus de capitulo suo. etiam citra medietatem eligendum electis. deleatur. etiam citra. et ponatur. ultra medietatem. etc.

Item hanc. In eodem capitulo. ubi dicitur. infra vero idem tempus. fratres alii non admittantur in conventibus ad discussionem eorum. que ad generale. vel provinciale capitulum sunt mittenda. nec ad electionem socii prioris conventualis. nec etiam ad electionem electorum prioris provincialis.

Item hanc. In capitulo de studentibus. ubi dicitur. mittere ad studium. ad loca ubi viget studium. addatur. secundum consilium et ordinationem diffinitorum capituli provincialis; quibus etiam de eorum consilio providebit.

Item hanc. In eodem capitulo. ubi dicitur. et ad eundem libri. quos habuerit; pertinebunt. addatur. statuius autem. quod mortuo fratre de provincia. libri quos de eorum provisione habuerit. seu pecunia. ad provinciam pertineant et tam de libris. quam de pecunia. per priorem provincialem. et diffinitores provincialis capituli ordinetur. Si autem libros. vel pecuniam habuerit a conventu. ipso mortuo. et libri. et pecunia. ad conventum unde ipse habuerit; pertinebunt. Si qua autem aliunde habuerit. sint conventus illius. cui erat frater mortuus assignatus.

Item hanc. Ubi dicitur in ordinario. quod fratres in parasceve discalciati vadant. vel intrent capitulum. deleatur totum.

Admonemus. quod acta capituli generalis. et litere magistri. legantur fratribus ad provinciale capitulum congregatis. ante electionem diffinitorum.

Item. Quando eligitur magister. vel prior provincialis. vel conventualis. publicato scrutinio; unus eligat vice omnium nominantium; sive eligendum.

Item. Quod non committatur priori provinciali. et diffinitoribus provincialis capituli. electio visitorum. nec etiam diffinitoris capituli generalis. sed secundum formam expressam in constitutionibus; eligantur.

Item. Non inducantur novicii ad pitanciam faciendam.

Item. Fratres in electionibus non abrenuncient voci sue.

Item. Scapularia fratrum conversorum superiora; non sint lata ultra medietatem brachii · inter cubitum et manum. et qui aliter habentur per priores vel eorum vicarios. usque ad · vii · dies. ex quo admonitionem istam sciverint; corrigantur. et caveant. ne inferiora scapularia eorum. tendant ad albedinem. sed sint grisei coloris; sicut dicit constitutio. et si qua aliter sunt; quantocius corrigantur.

Item. Conversi dum sunt in conventu. non dicant horas canonicas. vel de beata virgine; ita quod ab aliis audiantur. et si qui habent psalteria. vel aliquos libel-los; infra · xv · dies auferantur ab eis. per priores vel eorum vicarios.

Item. Fratres qui scribunt magistro ordinis. vel capitulo generali. exprimant plenarie nomina sua in literis. ponendo etiam provinciam suam et conventum.

Item. Prior vel supprior. cum conventus surgit a mensa. in loco suo stantes. pulsent nolam refectorii.

Item. Qui in refectorio ad collationem dicit. largitor omnium bonorum. etc. surgens dicat.

Item. Operariis in domo nostra. non paretur bina refectio. in ieiuniis ab ecclesia institutis.

Item. Ut uniformitas observetur. idcirco admonemus quod prostrationes extra chorum non fiant. sed inclinationes ubique serventur.

Item. Fratres qui non sunt predicatorum generales. et habent sigilla. sive propria. sive communia; ipsa infra quindenam prioribus suis resignent.

Item. Litere domini Hugonis cardinalis. misse ad capitulum generale. in capitulis provincialibus legantur. et quilibet socius prioris. ad suum conventum deferat³.

Monemus autem et rogamus. quod admonitiones ibi facte; cum diligencia serventur.

Iniungimus priori provinciali Provincie et diffinitoribus capituli provincialis. in proximo apud Burdegalam celebrandi. quod auferant scapularia alba fratribus conversis de Prulliano usque ad duos menses post suum provinciale capitulum. et de cetero; eos nullatenus habere permittant.

Item. Mandat magister ordinis. prioribus provincialibus. vel eorum vicariis. quod scribant ei ad sequens generale capitulum. quot domos sororum nostrarum. habent in suis provinciis. et numerum sororum in qualibet domo. et quos habeant proventus. et redditus. et qua auctoritate sunt eis commisse.

Item. Concedit magister ordinis. quod quilibet prior provincialis. possit mittere unum vel duos fratres discretos et religiosos ad curiam. pro factis sue provincie. qui sint ibi continue. et provideatur eis a suo provinciali in vestibus. Si autem aliquis prior provincialis ad curiam mittere secundum predictam formam

³ Quas litteras publici iuris fecit FINKE l.c.p. 52, n.

noluerit; prohibet magister districte. ne aliquos fratres ad curiam mittere presumat. nisi secundum quod in constitutionibus continetur. et revocat licencias. si quas super hoc dedit.

Item. Volumus. quod fratres de Ungaria. et aliis provinciis. si eos de terra sua fugere contigerit; caritative recipiantur in provinciis. quousque per magistrum ordinis de eis ordinetur.

Quicumque scripserunt usque hodie aliquid de officio. non dent ad transcribendum aliis. quousque correctae fuerint diligenter; ea que scripserunt ad exemplaria que sunt Parisius. et quicumque amodo scribent. non utantur illis scriptis. quousque per fratres diligenter correctae fuerint scripta illa. nec credatur particularibus correctionibus. quas quidam dicuntur portasse in quaternis et cedulis.

Ista sunt **suffragia**.

Pro domino papa. etc. Sciant fratres quod capitulum generale olim concessit fratri Raymundo de Penaforti. quod fiat pro eo sicut pro magistro ordinis. post mortem suam.

Absolvimus priores provinciales Ispanie et Theotonie.

Item. Fratres ad. o dulcis Maria. de sero non flectant genua sicut ad. salve regina. sed inclinent profunde.

Capitulum generale sequens. assignamus Tolose in provincia Provincie.

Ista sunt **memorialia** fratris Troiani procuratoris ordinis; ad magistrum.

In primis supplico. ut propter multos defectus meos. velitis alium substituere procuratorem. Item sitis memor monitiones in capitulo facere. quod omnes fratres qui scribunt pro aliquibus negociis procuratori ordinis. diligenter et distincte; ipsa negocia explicant. Item petitiones. si volunt aliquas in curia optinere. faciant eas formari a sapientibus suis. quia postea si necesse fuerit faciam secundum formam curie; reformari.

Item. Quando scribunt pro aliquibus negociis optinendis. super quibus sunt necessarii iudices. vel executores. ipsos distincte nominent. dyocesim unde trahunt originem diligenter exprimendo.

Item. Quando fratres michi scribunt. scribant de qua provincia secundum ordinem. secundo si sunt in episcopatu. hoc est in civitate vel dyocesi. et hec cum scribunt. diligenter exprimant. Item quando aliquas literas scribunt domino pape. vel cardinalibus michi earum tenorem in scriptis mittant. ut postmodum eos super hiis requiram.

Item. Sint solliciti mittere sufficientem pecuniam pro negociis expediendis. consueverunt enim michi fratres scribere. quod negocia eorum expediam. et postquam literas expeditionis habuerint; michi mittere pecuniam procurabunt. Et quandoque contingit quod expeditur negocium in petitionibus. in notis. et in litera grossa. et postea destruuntur. et expense non restituuntur. Et quando mittunt pecuniam; tarde remittunt. et aliquando perditur in via. Propter que et alia quedam sum multis debitis obligatus.

Ultimo vero supplico. ut me pro omnibus laborantem; oracionibus omnium recomendare velitis.

Actis additae sunt litterae magistri ordinis; cf. app. n. IX.